

mi vignivin lis lagrimis tai voi... gno pari al jere komunist e a cjase o vevin la enciclopedie IO E GLI ALTRI, dulà che si fevelave ancje di sesso e a jerin dai disens di operaris in salopette blu che a fasevin esplodi i parons in marsine e cilindri.

E i ABBA? E la biele S.O.S.? E Mama Mia? E Fernando? E... forse la plui biele di dutis, EAGLE?

Ancje cumò i ABBA an son simpri tal gno cûr e par me a jerin dai rivoluzionaris come gno pari, mâl viodût in paîs parcè komunist!

Mai let il test di FERNANDO?

“Rivistu a sintî i tambûrs, Fernando? Mi visi agns indaûr di une gnot stelade come cheste. A la lûs dal fûc, Fernando... o jerin zovins e plens di vite e no jerin preparâts a murî, no mi vergogni a disi che il rumôr dai canons e des pistolis mi faseve vaî. Al jere alc intal aiar chê gnot; lis stelis a brilavin, Fernando, a brilavin parsore di me e di te pe libertât, Fernando!”

E EAGLE? E je un autentic imni a la libertât cence cunfins, come jentrâ tai dominis celestj di creaturis aladis che a cavalchin l’aiar!

ABBA: o cjatavi i lôr discs in omaç tai blister de Coca-Coca. O sai che la Coca e je une bevande capitaliste ma no sai ce che o darès par vê tignût une latine cu la scrite in cyrilic des Olimpiadis di Mosca 80! O vaivi cuant che te ceremonie par sierâ i zûcs o viodevi l’ors Misha che al saludave e i jesseve une lagrime! Lu vevin fat centenârs di figurants sui spalts dal stadi cun milante tessaris coloradis.

Voulez-vous coucher avec moi, ce soir?

Sì, mi imagjinavi che mi disès cussì Paula, la “Indiane”, sì, chê che e jere cun me a lis mediis.

Ma jo o jeri masse timit e jê mi veve fevelât dome une volte, tornant cjase in coriere di Udin cuant che o jeri tal Lyceu Classic, chê scuolate di mumiiis. Ce vòs androgjine che e veve!

Mi visi dal 1976, cuant che e passave in bici pal gno borc, la dî dai Sants, cun chei stivalets ros di plastiche e il maion di lane... e jere cuntune sô amie, chê cui cjavei a mat e jo no vevi vût il coragjo di disii nie.

di Checo Tam

